

25 AUG 2003

Kadir-agama

KHUTBAH KHAS KEMERDEKAAN DI MASJID NEGARA JUMAAT INI

KUALA LUMPUR, 25 Ogos (Bernama) -- Khutbah Khas Kemerdekaan akan dibaca untuk solat Jumaat minggu ini di Masjid Negara sempena sambutan Bulan Kemerdekaan bagi menyatakan kesyukuran terhadap kemakmuran dan keselamatan yang dikurniakan kepada negara ini.

Menteri Kebudayaan, Kesenian dan Pelancongan Datuk Paduka Abdul Kadir Sheikh Fadzir berkata Yang di-Pertuan Agong Tuanku Syed Sirajuddin Syed Putra Jamalullail dijadual berangkat menunaikan sembahyang Jumaat pada hari itu bersama-sama dengan Perdana Menteri Datuk Seri Dr Mahathir Mohamad, Timbalan Perdana Menteri Datuk Seri Abdullah Ahmad Badawi dan beberapa menteri kabinet.

Bercakap pada sidang media di sini hari ini, beliau berkata selain agama Islam, majlis kesyukuran seperti itu juga diraikan oleh penganut agama lain yang akan membacakan doa Kemerdekaan Khas.

Bagi agama Hindu, majlis itu akan berlangsung pada 29 Ogos ini di Kuil Sri Sundaja Perumal di Klang. Ia akan dihadiri Presiden MIC dan Menteri Kerja Raya Datuk Seri S.Samy Vellu.

Penganut agama Buddha telahpun mengadakan majlis itu di Buddhist Vihara, Jalan Brickfields di sini pada Sabtu lepas yang dihadiri oleh Menteri Pengangkutan Datuk Chan Kong Choy.

Penganut agama Kristian akan mengadakan upacara itu di Menara PGRM juga pada 29 Ogos ini.

Abdul Kadir berkata acara berbentuk keagamaan penting bagi membolehkan semua kaum melahirkan perasaan syukur terhadap kesejahteraan dan kemakmuran serta perpaduan di negara ini.

-- BERNAMA
SSA KHY MAI